

鄱陽縣志卷之十二

人物

下

儒行

雷義

義字仲公東漢時爲郡功曹舉善不伐嘗濟人死罪罪者謝以金不受遂密置承塵上義後得金其人已死乃以付縣後舉孝廉拜尚書郎有同時郎坐事當刑義默自表取其罪同臺郎覺之委位自上乞贖義

鄱陽縣志

十二卷

儒行一

罪順帝詔皆除焉又舉茂才讓于陳重刺史不聽遂狺狂走不應命里人語曰自謂膠漆堅不如雷與陳三府俱同辟義持節督郡國行風俗太守令長坐者七十人旋拜侍御史除南頓令子授官蒼梧太守

范逵

逵舉孝廉屢聘始出內史虞溥立光俗坊以表其里嘗過陶侃宿侃母截髮易酒穀以延及去侃送至百里逵曰士行欲仕乎

侃曰然第無津耳達遂薦侃于廬江太守
張夔辟爲主簿竟以名顯皆達發之也子
珣官至湘東太守

呂雲仲

雲仲原名天孫別號文山臨安司戶桂長
子咸淳間雲仲入太學爲文不逐時好以
行誼著聞後拜國子學諭嘗語人曰文由
道而著也要如穀粟布帛人間不可無者
又曰文要易而難不可難而易也識者稱

鄱陽縣志

十二卷

儒行二

之里有忿爭者不之公庭而于雲仲取直
焉

徐素

素字淡如先籍餘干元末兵起挈家饒城
遂爲鄱人性穎敏博學有俊才邃于易禮
楷書得歐陽率更顏魯公灑郡守陶安一
見重之語人曰淡如儒者公暇則延素咨
諏民俗素傾心無隱嘗語學者曰讀書貴
明理明理以誠身都是自己事若希世用

讀書則所讀者僞而已安能誠其身乎爲
文善叙事有議論詩有氣格所著澹湖集
十卷先是郡學燬于兵素率同學生舁列
像寘天寧寺後遂因其殿爲文廟增飭具
備輸奐一新卽明府庠本素之畫也

周輿

輿字壯輿伯琦姪元末兵亂避地寓絳縣
世平遂占籍焉洪武間詔求賢絳令曰文
學之科無踰周先生舉送京官之會病力

鄆陽縣志

十二卷

儒行 三

辭尋開絳籍回鄆日聚徒教授沉潛經史
邑令岑如心素聞輿名聘教邑庠以疾辭
輿性介直有古人風人有謁者延接歡甚
第目其容止少肆則拂袖而起室焚趨家
廟抱神主不救貲產鄰里爲之救者反阻
之或問其故輿曰吾積罪愆神故告之今
救逆神意增吾譴爾自是家徒壁立處之
泰然卒年八十七子著績亦有文名

嚴彪

彪字弼中治春秋詩兩經領天順己卯鄉薦明年中乙榜例授學職彪曰姑爲老母祿養不亦可乎就訓歸安改建陽考最得擢爲縣願復領教職冢宰尹旻歎以爲難陞山陰學諭教先彝倫士有兄弟爭訟者責以叛天性且引咎自責兄弟感悟遂成友愛周生漳事繼母孝歲試當黜亟白督學得免因以充貢由是士皆激勸敦行病足致仕歸自謂母老可就教職性澹可辭

鄱陽縣志

十二卷

儒行

四

熱官足疾可早引退號三可人稱爲三可先生卒年七十四而泰其孫見後載

吳霖

楊文升

霖領成化癸卯鄉薦授霍山知縣政務簡靜民德之後致仕歸淡然自守足跡不入城市郡守彭辨之乃霍山人初至以夙契固請始來一面旣別約曰吾族衆或冒誑者毋輕信且戒其子弟彭遣問不絕霖竟無一劄相報時同舉楊文升歷建寧教授

襄府紀善會與試廣東一時名士多所甄收及家居有門人宦游來謁者待以盤餐而不往荅饋遺無所受辨之亦相信贈以木襄其葺居固辭其狷介政與霖相類惟是好譏切時事言長厚者不歸焉

劉琬

琬字端卿貢入禮部授延平訓導陞新喻教諭自諸生時以砥行能文名安貧好孝手不釋卷家居一小樓環列圖書吟哦其中

鄱陽縣志

十二卷

儒行

五

或曰先生不復帖括試科河乃爾琬曰書專爲科第設耶吾自樂此卒年八十八載希賢

好修篤義與同庠生戴銳俱以歲試停廩希賢不自蒞意乃以銳母老失贍力爲之請督學蔡可泉詢之非同族也高其義兩復之後出貢希賢官休寧教諭

史梓芳

梓芳字景贇別號瑞山番之西隅人梓芳

孕十五月而誕性穎敏喜讀書年十四補弟子員十六卽餼于庠文名燥甚與劉公應麒祝公世祿同事筆研皆以國士欽之屢試棘闈以數奇弗遇厥後以廩例補國子生平生古道自矢孝養厥父母而事庶母尤篤設帳受徒教以敦行爲先嘗曰讀書苟能遠聲利薄嗜慾隨處體認天理便是真正學問約諸同志如廉靖嚴而泰輩爲講學友名輔仁會居恒作三畏箴四知

鄱陽縣志

十二卷

儒行

六

銘以自警至其恤貧乏焚積券鄉里皆德之所稱文行優脩者歟臨終危坐猶手書一卷不釋卒年八十四

嚴而泰

而泰字師孔三可先生孫也弱冠領萬曆癸酉鄉薦庚辰中乙榜授彝陵學正薦入南雍助教能以師道自重服士心陞潁州守治行著聞卒于官年四十二而泰結髮靜修迄于疆仕粹然一節鄉評與之

朱大德

大德字元卿萬曆乙酉鄉薦授信州永豐
教諭陞廣西永福知縣卒官于大德性醇謹
兢兢禮澹平生未嘗干人以私居母喪廬
墓者三年絕跡偃室與嚴而泰俱師事史
汝寧稱高足焉在永豐得士心永福小邑
未展其才當路議調劇力辭訟庭常間唯
行鄉約化俗櫬歸之日傾邑號送

强尚質

鄱陽縣志

十二卷

儒行

七

尚質字繩一西隅人天性孝友待弟撫姪
曲盡恩禮爲人寬和莊重一方推爲師表
幼負敏才作古今文詞援筆立就兼善書
畫晚以明經司訓建之新城師道卓然多
士愛而化之以疾卒于官年七十四無子
門人王登雲徒步迎柩歸登雲字羽儀邑
庠生有雋才工詩文善行草法帖士論稱
之

史書昌

書昌字光卿號二周其先世別有傳昌天
資卓異幼讀書卽以古人自期見人所爲
制義嘆曰聖賢垂訓無非欲後人究圖于
身心性命之寔若區區咕嗶以干祿仕吾
竊薄之遂閉戶窮經旁搜子史百家言獨
服膺性理一書暨濂洛關閩諸語錄吟嘯
自適於塵囂漠如也性好施予家計雖窘
見人有急難救之不遺餘力又樂以理喻
人無問賢愚胥化之會道拾遺金必竚俟

其人還之人願平分以酬峻拒之乃感泣
祝天而去又於嚴冬道中見人僵什雪內
急解衣覆之俟其甦具飲食米粟道之去
終不問其姓氏初年十四諸昆皆別業昌
偕幼弟奉親承顏順志孺慕終身若一日
焉凡言行必以先賢爲法庭訓諸子輒曰
士先器識而後文藝爾輩當以前賢道義
持躬他日致用必本于此又曰貧者士之
常少一分嗜慾便多一分天理慎勿以溫

飽累厥心也是其究理明信道篤超出于
梯榮任慾者萬萬而隨力到處便能力及物
更有得于敦行之寔者崇祀鄉賢

紀杭

杭字勝卿南隅人生有異質岸然不羣伍兒

時父洲以屢困棘闈勗之曰爾輩當從帖

括中爲爾父吐氣遂杭研精制舉業髫年同

思岡陳公名聞庠序陳先達以直聲重天

下杭攻苦日深旣而歎曰聖賢之道當不

鄱陽縣志

十二卷

儒行

九

止此聞祝子無功潘子雪松輩講學銀邑
徒步從之遊凡六易寒暑自是深造自得
不復以利達動其心萬曆辛卯闈中擬冠
葩經以五策過激抑置乙榜晚就明經廷
試舟泊江干夜夢神人捧之水上翌日風
作舟覆飄流數里不没幸而獲濟因別號
更生主人初訓鍾陵繼諭光化所至以興
學作人爲己任又明年擢知普安州遂乞
歸行李蕭然舟車之費莫充嘆曰吾之貧

慕靖節學希武公擬輯陶武集合平日詩
文剛之忽遘疾不果隨卒司農陳公大道
銘其墓

江日敏

日敏字信劬郡庠生廉憲江和之子也生
而孝恭性尤篤厚嘗隨父任之秦之蜀所
至惟以仁愛存心其最大者父嘗恤刑三
秦多所平反生活疑獄者不下數百人日
敏皆與力贊成之有文正父子同心之風

鄱陽縣志

十二卷

儒行十

焉俗多溺女心竊痛之編爲詩歌廣導四
方且陳請當道力行禁止一時陋習賴以
還淳鄉里有疾者施以藥劑貧而有喪者
助以錢粟其樂善不倦難以備述至其方
正自持言笑不苟雖燕居獨處手書一卷
必整衣高冠畧無惰容所稱古貌古心殆
其人歟年七十五卒

劉惟遠

惟遠字近之北隅人家學相承讀書不徒

事章句惟以砥躬勵節爲先務推己及人必極其誠敬凡言動取予一以前賢爲師洵天資篤寔廉隅自守者子三省三策供登賢書三策別有傳

陳 鯁

鯁字惟魯鄱陽人性端潔嗜學文名藉甚惟讀書授徒資束修以自給非其道一介不取垂及歲薦忽弃舉子業弄月吟風飄然有自得之致太守象陸翟公深器重之

鄱陽縣志

十二卷

儒行

十一

鯁與論難經義卒無一語及私時論高之卒年七十二

董有章

有章字闇如東隅人已丑歲貢文章高古屢爲當事所知性耿介渾樸與物無競家不甚厚出資財以濟族之婚葬幼女曾受蕭氏聘蕭氏子被掠杳無音問有章誓不悔盟後二十年蕭氏子歸伊父母俱亡家無立錫有章備裝資招之同君撫養一如

己子甲寅避兵儒塘一日沐浴而逝年八十有七

曹奏績

奏績字底可 人郡庠生初受知於分

巡使者葛公寅亮每以省元期之後卒不

遇生平篤學力行言笑不苟與後學語必

以躬行勗之四壁蕭然不以勢利動心曾

一與修郡邑志年八十五卒同時有邑庠

生陳鯁字惟魯程四達字心如俱以學行相砥勵云

孝友

鄱陽縣志

十二卷

孝友 十二

陳饒奴

饒奴年十二父母俱亡寡弱值歲大饑或

勸其分弟妹可全軀命饒奴流涕再三日

丐于市以相全養唐刺史李復異之給以

資儲表其門曰孝友童子

張吉

吉母方娠其父介客遊西蜀不還吉爲兒

時常與彭汝礪同學作詩云應是子規啼

不到至今我父未歸家聞者憐之旣長八

蜀迎父往返者三其父遂以熙寧十年二月至鄉人迎謁歎息汝礪贈以詩略云河可以竭山可徙我翁不歸行不已三徃三復翁歸止翁行方壯今老矣兒昔未生今壯齒郭公父詩略云父昔離家子方孕子得其父今壯年胡不歸兮死敢請慰我慈母心懸懸三徃三復又十年孝方子言執還鞭

潘懷

懷字景進元季兵亂懷與弟侍父希古北

鄱陽縣志

十二卷

孝友

十三

走明年還值閩寇再發遇于郭璞山下縛希古索金露辦脇之懷爭前曰吾貧民流離乞食無所有有則金不重于父將軍必欲逞怒請代父寇試之卽引頸弟亦爭代寇憫其孝併釋之洪武四年懷被薦官湖廣稅課大使子震初善詩

章全

全字雲渠父正字方大洪武壬申十月全母梁氏邁疾醫弗效全齋沐焚香籲天願

減己壽以益母刲右股烹粥以膳母母病愈後永樂戊子五月父遘疾復刲左股烹粥膳父父病亦愈人皆難之

詹正

正字季雅洪武末邑人余世清知慈谿縣薦正爲慈谿學官正念親老陳情乞便養得授樂平訓導遭喪廬墓終制如初服闋補沛縣儒學卒于官

劉彥清

鄱陽縣志

十二卷

孝友

十四

彥清名會以字行耕雲六世孫讀書敦義以醫世其家母魏疾藥石不効露香告天刲股和粥以飼疾遂愈會征廣以醫選從行中途渡江墮水適有牛渡攀其尾得濟旣歸過彭蠡風浪覆舟人盡溺獨賴舟板以全兩免大難人以爲孝感子孟啓永樂間薦入太醫院

應善

善字永慶少補郡庠生永樂間以事註誤

爲吏母喪廬墓三載哀毀如初正統間授
山東日照縣丞父喪復廬墓每旦拜哭墓
前焚化紙灰飛泊墓木成繭其色白其狀
如棗下尖長可寸許人異之有司以其

事聞

陳志昂

孫之可

志昂字時顥父必達入太學卒志昂年十
二領二力走金陵迎柩歸窆旣免喪歲時
墓祭哀動路人益謹事母母沒以嘗不得
盡禮于父悉所有以供歛葬孫之可字汝

鄱陽縣志

十二卷

孝友

十五

時童年母卒哀毀成羸疾初婚痛不及母
命不忍成婚卽室內爲母位哭奠夜深跪
哭不起遂昏眩臥地至曉父沒不葷酒不
入內者三年竟以羸疾卒孝子有旌表例
而無祀鄉賢者有之自之可始咸稱

異數

云

葉耕

耕字希尹貌古心慤事親孝舉事間有不
經者人以爲病風然不失爲善母沒塋薦
福山廬墓三載寒夜風霜口骨人所不堪

父愈清客死于閩耕往取旅襯歸塋復廬墓三載

陳塾

塾字子學孝子之可子也侍父疾卧床下者數年及父喪服闋從諸生以理學孝友請祀父鄉賢當事從之并旌塾以世篤孝恭額後舉明經授新昌訓導遷河池州學正擢廣西桂林府別駕居官清直不諧于俗竟坐失米罷歸里居講學不輟江不流

鄱陽縣志

十二卷

十六

先生贊之曰諸生則先志不舍靈龜觀朶頤當官則先事不屑瓦全甘玉碎誠有守士也卒年七十六崇祀鄉賢子曾郡庠生夙負意氣競尚名節尤以工詩名

王良弼

良弼字宗臣二十八都人伯祖夢祥弘治間輸粟賑饑建坊弼幼習舉業補弟子員既而厭去之遂潛心實學父母歿廬墓三年巡方旌扁曰有志循理

李岐

岐八都人其家四世未析居至岐以孝聞
巡按陳公旌之曰四世同居友愛承乎先
德一門敦孝和順藹于家庭因得請建坊

徐子揚

子揚字述方鳳岡人生有至性七歲時父
方洲館于新義操氏墜樓折體聞之號泣
往視湯藥年及九齡鄉先達陳公文衡守
潘粵東巡方洲課其子子揚不忍父遠涉

鄱陽縣志

十二卷

孝友

十七

多方謝使者父止而復行及父母連喪哀
毀遂至喪明後二十年外目復能視識補
邑庠生每以古道訓人不輟口卒年七十

閔繼訓

繼訓字若伊東隅人父必達以明經任訓
導繼訓其幼子也年甫十三父疾割股進
之而愈邑侯潘公禹謨暨郡侯黃公琮俱
以孝友旌之學諭曹行健著有閔孺子傳

江德

德字恒修六都人母有疾禱以身代及塋廬于墓有虎衛于傍兔繞于側里人傳其事聞于太守象陸翟公大加獎賞給餼贍之會巡方使至廉知其孝亦加優待

王元吉

元吉崇十三都人未嘗讀書能躬耕事父事繼母不異所生父疾割股以進疾隨瘳雖非純德而一行亦有可取云

胡正遇

鄱陽縣志

十二卷

孝友

十八

正遇字幼失父賴母撫養及長家貧無措傭工資升斗以爲養母患病醫藥乏資割股以救者三次及母喪哀毀不必言也且廬墓所六載事聞道府廳縣俱有獎賞并給資娶妻幸生有子以延厥祀是卽孝德之報云

王文仲

文仲千秋鄉人週歲失父賴母撫養迄成人痛父早亾不及養止有母存且感恩養

三遇母恙三割其股兩臂癍痕依然及母
喪哀毀骨立廬墓六載虎繞兔馴了無懼
容隣里呈縣旌以扁曰孝繼濬冲

孝義

附尚義

史仲偉

仲偉字古泉西隅人其先世諱崇者以功
封溧陽侯至可甦代有隱德宦蹟而偉以
孝義著偉初儒而貧母羅氏邁疾齋沐顛
天願以身代及歿竭力營塋以衣裾兜土

鄱陽縣志

十二卷

義勇

十九

成墳旦夕哭拜墓下百日產瑞芝徑尺人
異之以爲孝感一日行義倉旁偶拾遺金
近百封識納糧字樣偉俟其人終日弗至
乃上之邑令毛君孔墀高其義命鼓吹送
歸宅明日張示令人諸縣驗對旣符還
之未幾家獲古藏偉曰此天之所以予我
者而敢負哉邑有院山坑暨檀湖埯俱病
涉溺害偉捐重資悉甃石建梁勒曰判官
曰下埠行者至今賴焉歲饑捐穀千石助

賑兼作粥糜以餉行人一時全活甚衆直指吳公題請冠帶以褒之邑庠宮殿隳剝偉費修葺復助正樑一圍必構椿木美材以壯瞻仰當事嘉其誠額以饗校耆猷喜且祝曰俾爾子孫振振從茲賢關入在當時一贊語厥後諸嗣孫文學明經彬彬蔚起其曾孫彪古登巍科歷官侍從皆積厚流光之驗云偉壽九十三厥配趙氏九十有五

鄱陽縣志

十二卷

義勇

又十九

朱厚鑿

厚鑿字桂軒明初宗子也天性馴厚與人謙抑自下略無貴戚容早失怙事母惟謹省問侍疾必竭誠盡禮治喪不出戶庭衰經號痛雖寢臥弗懈匡廬白鹿洞爲古今讀書名區鑣欲廣勵多士捐自置都昌庄田二百九十二畝計租四百餘石歲入紫陽倉以佐諸生日廩費撫按使者欽其高風額孰國養賢以旌之文莊鄒守益撰宗

藩義田記于白鹿洞極贊厥功碑石可考
堪垂不朽云

王三顧

三顧號葛峰二十八都人朴誠好義憂人
之憂厥叔良弼及從弟三省俱早卒良弼
遺三子皆幼而三省一子甫及週逼處強
梁時多內釁三顧力爲調護俾咸得成立
爰及後裔其雅誼有足嘉者又族子道成
資穎而貧三顧委曲周之凡誦讀費胥取

鄱陽縣志

十二卷

義勇

二十

給焉及萬曆壬子獲登賢書皆其成就之
力其幼子尙方延及曾孫用佐亦領鄉薦
爲厚德之報年八十八卒足跡未履城市
蔡之萱

之萱字子牧蔡家灣人孝友謙謹癸卯登
賢書甲寅冬額將軍復饒州招之萱料理
草料將軍往廣信賊復熾母被掠之萱卽
挺身出救母得釋而縛之萱以往勒受爲
職不從竟同福督范承□等遇害于井樓

門外

夏燧

燧東隅人崇禎間鄉飲介惟孝義年十八
刲股救母邑侯饒震元給扁旌之有楚商
黃中理來饒途遇盜攫其金苦甚欲自盡
燧憐其情急以己資六十兩贈之使載妻
子歸鄉徽人揚元與客徐鳳共投宿揚元
夜失銀疑鳳竊取鳳迫投井燧力爲勸解
捐資代償後竟不與鳳一面至若里人汪

鄱陽縣志

十二卷

義勇

又廿

繼和貧不克殮燧代襄其喪塋并資繼和
八旬之母洪氏衣米皆其事之矯矯過人
云

王永年

已下俱
尚義

永年南隅人性仁厚能恤粵周急不祈人
報景泰七年郡大饑有司募民發粟助賑
永年傾儲得穀一千七百石輸官有司上
其名予冠帶褒之辭不受太守黃公堅高
其義書句于廬曰應詔能輸千古粟承恩

留得萬年名四世孫道行孝義亦有可風云

余諤

諤塔水橋人性好施予嘉靖間值年饑發粟助賑并作粥糜以食行人其饑而死者給棺衾以葬之計施棺百四十餘具又于族人之貧者每歲除必厚資之嘗養二鶴自娛其一偶斃因號隻鶴翁

計美材

鄱陽縣志

十二卷

義勇

廿一

美材字一貞崇十三都人幼驚敏讀書夜分不寐老以明經考授州判未任歸爲人樸直家溫而好義嘗語人曰吾先世未嘗以私負涉公庭鄉人聞其言多巧爲逋負計哭訴于前卽取券焚之人感其德有子弟欲以爭資產訟者折之曰若以財利起釁是自蹈不義也何以爲人其敦尚厚道如此

鍾國娘

子琪華

國煊字照臨五十二都人生而朴寔尤好
施予賑給之外時蓄藥以濟貧病而修岸
造舟利賴尤衆屢舉鄉飲賔辭不赴太守
梁公惕居旌碩德耆儒年八十嘗自誌爲
樂善山人

義勇

袁贇

贇隋大業間兵亂倡義聚郭內居民相保
守操師乞自新昌來攻城贇不支出居水

鄱陽縣志

十二卷

義勇

又廿一

南童敏故城與張善安大戰斬獲甚多武
德初授懷州刺使

蔡明遠

明遠唐時爲本邑校顏魯公絕糧江淮間
明遠載米濟之魯公感其意手尺書以贈
盛傳于世又嘗言明遠始終之際

良可
稱述

甯廖

廖同弟襄聚義兵拒賊黃巢保饒歙二州
以功官御史大夫與金日安皆廟食

周樸

樸字吉甫美髭髯有大志初從學于黃應
博又從學于張采采奇其才處之家塾吉
甫以其知己事之不去時盜起江湖間州
將以采知兵使督州兵討之盜有張家僮
率衆掠邑里采將攻之而賊先發遂遇害
吉甫走告州將曰張提督爲賊所殺諸子
皆幼吾當爲師復讐禮報讐不書于士則
有罪不敢不告也州將義之授以兵兵寡

鄱陽縣志

十二卷

義勇

二十二

議者勸募兵吉甫曰我募而衆彼益衆矣
不若出其不意亟擊之卽擣賊所賊窮以
金擲地兵爭取金賊脫去吉甫立斬數人
以狗慷慨流涕誓不與賊俱生衆感動願
效死力攻一寨破之餘寨皆走乘勝追擊
斬首數千生擒僮賊斬之俎其心肺爲文祭
其師時境內賊柵數十悉平元兵至州將
唐震死之衆勸吉甫降太守可得吉甫曰
吾爲師復讐而已他豈所望哉卽日散遣

所部隱居不復言功名景定元年八月沐
浴別親友索曆擇日端坐而卒長子暉元
至正進士應奉翰林同知制誥兼國史編
修

胡振祖

子節曾孫韶

振祖字振卿元至正壬辰兵起人多附之
振祖獨毅然樹義旗糾鄉民爲保障計明
年平章三且八以官軍駐饒元帥韓邦彥
爲前鋒振祖往迎爲鄉導遂復饒城以便

鄱陽縣志

十二卷

義勇

二十三

宜假振祖同知浮梁州又明年復假判饒
蘄兵再至元院判兵遁退保德興振祖率
兵轉戰遇歛寇汪童衆數萬乃營大游山
拒之相持兼旬累戰不利馬蹶被擒誘以
降不屈死時丙申九月也子節字叔儀洪
武間舉賢才官慶元知縣力請名公表揚
父義母節周伯琦爲書大雅堂宋景濂爲
之記曾孫韶成化甲辰進士官至刑部侍
郎嘉靖元年致政家居二十餘年鄉人愛

其和易卒年九十餘贈尚書謚康簡按程新
捍篁州墩里辨汪童本行同婺源人以忠勇聞義兵
破張鳳士游誠山所害先直是丙浮梁九月將乘勝取饒二城萬
主將忌其成功乃退而振祖傳云云蓋殘鄱
歛兩軍倉卒相遇互疑為陳友諒黨而鄱
之甚矣其為不可贖之憾也

劉明

明字衮明生而英偉好讀書為鄉里譽元
季壬辰蘄兵寇饒明糾集鄉民以義勇相
保守宮軍東來為嚮導克復郡邑總兵三

鄱陽縣志

十二卷

義勇

二十四

旦八屢加褒賞運糧開道遇賊力戰錄功
授浮梁州判官從征信陽病亟論左右曰
所恨者殘寇未滅不能盡忠于國耳言訖
而逝翰林待制李燦銘其墓

劉勳

勳字彥輔元季兵起倡義旗至正辛丑隨
守將于光以兵從明太祖征九江蘄黃克
台明定蘭秀山鎮閩中移鎮潮陽未幾卒

屈任

任字濟民元末紅巾倡亂任與弟直中暨同里操宗義輩糾集鄉民保障寇至挺身抗鋒鏑力屈被擒賊帥迫之從任曰棄母之養從汝強賊天地神祇所不容賊帥曰義士也釋之

胡重明

重明字養元以歲薦授贛州訓導後署安遠縣事明季土司兵變逼城重明奮不顧身督率固守及城陷朱衣坐堂上不爲動

鄱陽縣志

十二卷

義勇

二十五

兵殺之并殺其家屬七人唯一孫逃出獲免

隱逸

叙曰易言肥遯詩咏考槃巖穴之士歸潔其身者紀焉鄱自白石山人以前佚莫可考宋元之季趙劉懷瑾託跡鴻飛迨有釋戎衣以勇退却徵車而長往抗志浮雲均之高尚豈復借終南爲捷徑來北山之移文耶夫逃名者名歸徒浮慕焉卽自附巢

由是亦充隱未可與諸君子同堂語矣
姜夔

夔字堯章好學無所不通嘗請于朝欲正
頌臺樂律以議不合罷去往來吳越玉笥
銀峰間客寓苕溪與白石洞天爲鄰潘轉
庵號之曰白石道人所著有續書譜絳帖
評大樂議琴瑟考饒歌等書鄱陽姜氏太
守地祭酒金和之始祖也

趙緣督

鄱陽縣志

十二卷

隱逸

二十六

緣督隱遁自晦不知其名若字或曰名敬
字子恭莫能詳世同其自號稱之爲緣督
先生宋宗室胄習天官遁甲鈐式諸書志
在事功一日坐芝山酒肆中逢丈夫修眉
方瞳索酒酣飲先生異而卽之相與談論
者頗久丈夫曰先生曰汝來何遲也出口
中丹書遺之臨別先生問其姓名曰我扶
風石得之也得之蓋世傳杏林僊人云先
生自是于世事漠然不關意間徃東海上

獨居十年註周易數萬言復悉棄去乘青
騾從以蒼頭往來衢婺山水間人不見其
有所齎而資用未嘗乏竟不知爲何術卒
遂葬于衢之龍游鷄鳴山原先生之易已
亡于兵燼所著兵家書暨神僊方技之言
亦不存所存者革象新書而已

史可甦

可甦生而篤學晚托醫隱舊傳載元人曾
辟爲郡學錄屢徵弗就以先世有顯者義

鄱陽縣志

十二卷

隱逸

二十七

不忘宋有淵明遺風居餘干棠棣橋晚年
遷寓番城之西博涉羣書無所不貫因旁
通于醫邑人德其起死之功榜其堂曰更
生用是隱其眞名因合更生字以可甦稱
章起鳳贊曰術能托乎精微志不厭乎澹
泊其抱道自晦寓意于術以神其用易稱
潛德非其選歟舊府誌論列評載甚詳且
確今紀其畧云

劉琮玉

琮玉字潤芳貌修頎涉獵書史能詩以醫
隱其術多奇徃徃起人于死不責報事母
孝交友重然諾襟度高曠所與游皆一時
名士郡守陶安雅重之每調其懿才潔行
幾爲醫所掩爲賦積善堂長歌潤芳所著
有清華集其後五葉科第而叅政烈都御
史城尤顯著

楊煥文

劉翰附後

煥文讀書尚氣節元末壬辰兵亂煥文倡

鄱陽縣志

十二卷

隱逸

二十八

義旅保里閭民賴以安歸明初鄉有劇寇
馬某輩匿山谷剽掠爲害有司捕之不得
下令懸重賞以待獲者煥文密緝其踪募
勇敢數人入巢穴縛之械送有司上功幕
府給賞卻不受議錄其勞官之煥文辭曰
爲民除害爾豈希利祿耶拂衣歸與徐宗
周諸公講究河洛之書以耕釣終焉同時
劉翰字斯幹能文多勇力至正未隨叔彥
曷聚義兵及癸巳城陷挈家走信衢間復

隨彥昂屬于光假以官辭不受尋負母櫬
還塋歸明後德興殘寇竊發衆推翰往勦
生擒五人等議功賚力辭還家優游田里
卒年七十七嘗徵彥昂預銘其墓曰早經
艱險晚際清平進退自適無忝所生

朱基

周希茂

基字原立潛心篤學登鄉舉未幾以元末
兵亂遂不仕甘心林壑竟以隱終劉彥昂
作百哀詩及之先時周希茂歷官大中

鄱陽縣志

十二卷

隱逸

二十九

夫寶慶路總管與茶陵劉三吾使閩相友
善後以兵亂棄官還歸明後不復仕進及
三吾爲學士以詩招之不就年八十餘郡
人舉鄉飲亦不赴美髭髯有才譽別號草窓

曹福

福字如海性剛毅博覽羣書通數學尤熟
於史與人談亶亶忘倦如親歷當時者永
樂初朝廷行郡縣蒐羅往事人推福福亦
不辭慨然言之凡在元末明初饒六邑間

叛亂歸附捍禦等事及月日歷歷無差衆服其強識事親孝與友信卒年八十五

王景顏

景顏別號槐屋永樂間邵武府知府匡憲致書幣遣庠士李觀聘爲學職以母老辭自是索居田里不求仕進終其身焉

閔彥忠

子克貞

彥忠名恂以字顯東隅人飭行教家里人化之累薦不起著有芸軒集文藝內亦載

鄱陽縣志

十二卷

隱逸

三十

其少有俊才爲士林推譽嘗賦東湖十景詩曲盡其妙子克貞有父風永樂間監察御史陶圭薦之辭不赴

章孟宣

子鳳應

孟宣少孤苦志力學永樂間邑令曾寶舉經明行修辭以母老匡邵武復遣李觀來鄱聘孟宣爲學職辭不赴聚徒教授杜門不出幾四十年門人稱爲藏拙先生李時勉贊曰我用其拙而巧藏焉我藏其拙而

巧忘焉彼用其智爲巧之過實拙之媒以
賈其禍君子之守不務其名嗚呼先生百
世儀型子鳳應字汝鳴宣德間舉賢良官
常山知縣纂鄱陽景泰志藁二□卷

王士誠

士誠樂亭村人年高百歲有二足跡不履
城市躩躒似壯年重孫繞膝家訓端方邑
侯王公額云百齡國獻其從弟士贊好學
博古忠信樂施持公論享年八十而卒遠

鄱陽縣志

十二卷

卓識

三十一

近皆悲鄰里罷宴會昆仲可爲並傳云

卓識

雷煥

煥幼達象緯時張華問斗牛間紫氣煥曰
寶劍精耳在豐城乃補煥爲令掘獄入地
四丈餘得石函中有雙劍竝刻題一曰龍
泉一曰太阿煥取西山北巖土以拭光芒
艷發送一與華留一自佩或曰得兩送一
可乎煥曰本朝將亂張公當受其禍此□

當繫徐君墓樹耳靈異之物終當化去華
得劔報煥書曰詳觀劔文乃干將也莫邪
何不復至雖然神物終當合耳以西山土
不如華陰土因以土致煥後華誅劔失所
在煥卒子華爲州從事持劔過延平津劔
忽于腰間躍入水使人探之見兩龍蟠繞
歎曰先君化去張公終合之言此其驗平
文苑

叙曰史傳儒林復傳文苑蓋析而二之優

鄱陽縣志

十二卷

文苑

三十二

其文也丘里之言成一家是亦文也不必
家西京人盛唐焉間有濶畧細行是亦文
人結習束以純脩夫豈其倫取節焉可也
若劉典籤一見決眞主葉奉禮孤懷託沉
湘矯矯大節又藝林之獨步者歟

吉中孚

中孚大曆間與盧綸輩以詩名號十才子

官至戶部侍郎

按盧綸有送中孚還楚州
舊山詩疑亦流寓如綸省

志一統志俱列番人姑仍之以俟考

陳陶

陶字嵩伯武宣間自稱三教布衣好遊學
善天文長于雅頌有文錄十卷嚴宇牧豫
章陶隱西山操行清潔宇欲撓之遣小妓
蓮花往侍焉陶殊不采妓乃獻詩求去云
蓮花爲號玉爲腮珍重尚書遣妾來處士
不生巫峽夢虛勞神女下陽臺

董聲應

聲應德祐間進所纂諸史纂約兵鑑刑鑑

鄱陽縣志

十二卷

文苑

三十二

等書充史館編校文字

章甫

甫字冠之夙負才譽善詩後居吳下自號
轉菴作易足堂撰易足居士自鳴集十五
卷韓無咎爲之記

余永弼

永弼博通經史爲文章援筆而就自成一
家風格

黎廷瑞

廷瑞字祥仲登寶祐四年進士後仕元爲
學官博學善吟咏與梁必大湯景文吳得
昭吳仲退李思宣周南翁爲友時登山臨
流賡唱相娛廷瑞所著芳洲稿散逸僅有
傳者其造句工矣

徐芳谷

周伯顏
吳旭

徐天麟
蔡儒實
朱友問
徐省

芳谷字明善至元間任江西儒學提舉嘗
奉使安南世子陳日炫于席間索詩遂口
占云乘傳入南中雲章照海紅天邊龍虎

鄱陽縣志

十二卷

文苑

三十四

氣徼外馬牛風日月八荒燭車書萬里同
丹青入王會茅土祚無窮日炫遂納欵奉
貢歷聘江淞湖廣三省考試拔黃縉卿于
落卷中其時後先有周伯顏徐天麟工古
詩蔡儒實工絕句朱友問工詞章徐省翁
吳旭工唐律並以才著

葉蘭

蘭字楚庭父懋有才識善詞章仕元官至
大中大夫嘉興路總管多政蹟楚庭任太

常寺禮儀院奉禮從父于浙以詩名尤善
歌賦清潤古雅不作今人語明太祖受命
周伯琦應召楚庭贈以詩云覓得神鰲休
便休不須重上釣魚舟回頭更回溪山望
明月蘆花別是秋及伯琦朝見後深有省
于楚庭之言以其名薦再召乘舟至河石
橋口溺水死別號醉漁所著有寓菴集弟
蕙字楚芳占籍嘉興中洪武辛亥進士官
至東昌府尹

鄱陽縣志

十二卷

文苑

三十五

黃季倫

季倫別號淳齋自少窮墳典有才識任元
學博未幾至正兵亂解組歸明洪武初詔修
元史所著有詩文數卷

劉昺

弟彥煜 彥振

昺字彥昺家義城卓犖俊逸有大志元季
兵亂與弟煜結里閭相保寇至卻走聞安
慶余左丞賢往依之余待以國士計孤軍
不振辭歸往見信陽僉事宋的斤議頗合

爲畫守禦陳友諒兵至圍之昺間道請援
鉛山援至而城破回浮梁說叅政于光曰
當今豪傑無可爲者中原之師不能南下
張士誠據姑蘇玩兵富貴陳友諒有尾大
不掉之患惟金陵仁義之師盍就之以立
功光喜卽遣昺詣金陵明太祖嘉之遂問
江西昺曰江西有可圖之機授中書博士
廳典籤留叅贊帷幄久之遣還詔于光修
戰具以圖江西及江西下命昺叅贊沐總

鄱陽縣志

十二卷

文苑

三十六

制守鎮江尋授廣武衛親軍指揮使司知
事仍守鎮江又徵大都督府掌記外補東
阿縣尋引疾歸卒所著有春雨軒集爲宋
景濂楊廉夫危大素稱賞弟彥煜博通經
史善詞賦有聲死于兵彥振工籀灋通譯
書著篆韻集鈔宋景濂爲序作彥正

劉仔肩

仔肩字汝弼少從游元學錄操公琬洪武
初薦任荊州柘林河泊官未幾遷御史再

遷池州府同知卒于官所著有雅頌正音
臺閣遺蹟

王釐

釐字有成幼穎敏博學善文洪武三年以
明經授本邑教諭時學杖初興釐以斯文
爲己在勤于訓迪秩滿薦擢翰林修撰備
碩問奏對稱旨力丐外補改授南陽知縣
以疾卒釐出入經史百氏著羣英雜言及
編輯詩粹若干卷

鄱陽縣志

十二卷

文苑

三十七

王琛

琛字廷實邃于易肆力問學雖遭時亂不
廢知府陶安同知金聲經歷周慎皆一時
高士雅善琛嘗論文曰文以氣爲祖順理
成童之謂若雕鐫剪削我則不暇洪武九
年辟爲邑庠訓導後舉應明經科引疾辭
強起之詣京復力辭尋卒著有順成集

魏政

政字居敬別號堯山雪牧讀書能詩文洪

武中以良家子授句容尉踰年免歸開塾聚徒講授自給永樂三年邑令曾寶以工楷書薦起後奉使交趾卒

朱智

智字存禮博學多才工詩文洪武間辟爲郡椽後薦授靖江王府紀善宣德六年以老致仕少傅楊東里輩贈以詩有卿才卓犖不可羈雄詞健筆皆如飛語尤善真行得晉人書灑別號夢草所著有煑雪稿

鄱陽縣志

十二卷

文苑

三十八

舒子眞

子眞攻易學洪武間舉明經授涇縣主簿歷兩任歸橐蕭然教授自給德性和緩與物無忤文思泉涌號才子所著有芝山集

黃晟

晟字景昂善吟嘗遊廣陵有詩中二聯曰雲連廢堞秋鳴隼霜隕殘楊暮集鴉畫鷁有誰牽錦纜瑶臺無處覓瓊花頗盡傷古之意有稼軒集

丘霽

霽字時雍天順丁丑進士歷官蘇州知府
幼穎悟能詩文江懷素草灑負才子名著
有草堂集

俞璠

璠字潤夫善詩文閩中莊昶評其文頓挫
布置若柳子厚樊宗師詩類郊島其理到
語不減山谷后山邕達而茂者出入簡齋
云所著有楓落稿惜其不傳

鄱陽縣志

十二卷

文苑

三十九

李榕

榕字全年好蓄書多涉獵尤好吟詠罷教
論歸構一樓宅後俯瞰東湖扁曰玩鷗閩
人王遵巖爲之記榕亦自題其柱云近湖
不與鷗爭水到岸方知我有家徜徉其間
讀書澆花摩娑古玩客至必酌酌必歌老
而不倦卒年九十四所著有花月僊卿記

歐陽杲

杲字景初弱冠舉嘉靖辛卯鄉薦第一才

名籍甚十上春官未仕卒平生嗜書無他
好博涉經史過目不忘晚年尤精佛典撰
作頗富多獨得之見有瘞藏諸集後啓視
之皆浥爛不傳

姜金和

金和字節之父地潯州知府家居三十餘
年鄉人多其長厚金和嘉靖庚戌進士第
三名授翰林編修陞修撰時分宜柄政鄉
人競趨之金和在史局澹如也歷官坊論

鄱陽縣志

十二卷

文苑

四十

德南掌院南國學祭酒會疾作予告卒于
家孫荃林辛酉鄉榜丁丑成進士官寧國
知縣考選御史未任卒

江南錦

南錦字列明生有夙悟九歲能屬文十歲
解吟見者比之賓王鵝咏及長入邑庠聲
名藉甚天啓丁卯領鄉薦主試鴻寶倪公
獨賞其奇有桓譚絕倫之譽以足疾不能
上春官遂絕意進取專肆力于古文辭著

書甚富惜皆散逸其存者有四子書解揚子擬易註尚書釋義而梓以行世者貌嶠書屋文集而已錦博極諸子爲文皆另闢阡陌不蹈恒徑卓然自成一家云

史乘古

乘古字爾力西隅人性穎敏通諸經大義爲文未嘗起草弱冠入府庠崇禎己巳拔入南雍屢試不售遂杜門著述有但看讐字榮劉向直任通經老鄭元之句四方負

鄱陽縣志

十二卷

文苑

四十一

笈從遊者衆隨方訓迪鹽鹽不倦庚辰謁選授直隸寧津令承邑荒敝之餘雅意休養民懷其惠又保守孤城卒獲無虞以治行報最擢永平治中未任歸生平孝友天植初茹貧事母能守身弗辱以承其志後雖祿養而孺慕未嘗少衰與人樂易可親卽對子弟亦無疾言遽色凡姻族中稍知向學者必多方誘進雖率爾所談皆成名理聽者俱有所感發興起故一方好古之

風至今未衰其家居喪祭不用浮屠黃寇
一衷于古禮所著有瀛海紀事暨長短句
等集卒年六十五

列女

湛氏

豫章新淦人陶侃母也侃父丹娶湛爲妾
生侃時陶貧賤丹先亡湛勤女工資給之
令侃親師取友侃少爲潯陽縣吏嘗監魚
梁以鮓遺母母封鮓遺書責侃曰爾爲吏

鄱陽縣志

十二卷

列女

四十二

以官物遺我適增吾憂邑人孝廉范逵過
侃時大雪湛氏撤所卧薦剉以飼馬又密
截髮市供具逵聞之歎曰非此母不生此
子後侃竟以功顯

胡氏

宋潘希古妻希古病革胡曰夫死吾亦死
三子何得獨存願以身代死猶生也每夕
請禱希古果瘥越五日胡病卒事或偶然
其爲夫一念誠矣卒年三十三後子景進

景岳皆出仕

朱氏

元翰林供奉劉友梧妻友梧早卒遺三子
昺煜燮至正壬辰家燬于兵昺提義旅守
上饒燮沒于瘍煜爲讎家所害朱時值亂
離獨抱昺子玉珊艱苦備嘗後八年昺從
間道歸相與持哭朱曰吾所以不死者唯
此兒故爾昺迎養新安遷浮梁隨養卒年
五十王太史宋廉銘其墓曰夫人之節石

鄱陽縣志

十二卷

列女

四十三

堅玉貞何不享有遐福而憂患是嬰彼宰
物者孰尸其平然而德厚流光如筮斯徵
短雖一日長或千齡則夫人之不死者愈
遠而愈名史源之山封若斧形評隲馴行
太史勒銘後數百載尚知爲鄱陽節婦之
瑩

趙氏

元崑山都目趙嗣材女旣笄嫁爲胡振卿
妻振卿拒寇遇害遺子叔儀甫九歲趙堅

忍艱苦撫孤成立卒年八十七

姜氏

徐恕妻年二十四夫亡子孝恭甫二歲舅欲棄其志姜曰舅姑垂白不可無婦孤子襁褓不可無母言與淚俱下時值兵亂備歷艱苦終無他志

吳氏

方吉甫妻年二十八喪吉甫子志學在襁褓誓不再適或以言撼之吳哭曰三從之

鄱陽縣志

十二卷

列女

四十四

義婦人之常死何面目見夫于地下自是無復敢言者郡守胡天祐嘉其貞節爲之傳

周氏傅氏

周爲傅母周歸傅克仁年二十七克仁卒無嗣僅一女爲傅氏守志撫女及笄贅方志信生子應麟未亂志信亦卒傳年二十八與母相依甘貧堅守後表其門曰雙節

章氏

方克和妻克和蚤卒章氏年二十七二子俱幼自矢靡他勤紡績以撫育其子永樂元年知縣曾寶以其事聞

張氏

張榮祖女繼母不慈孝事尤謹年十六歸章閏益閏益卒張氏年二十七一子孟宣僅九歲一女普安四歲張撫膺計以死從親黨諭之稍解誓不再醮後母族諷使他適張厲聲拒絕之由是不復歸寧苦節育

鄱陽縣志

十二卷

列女

四十五

孤至于成立

金氏

鄭可與妻可與疾篤呼金語曰吾命殆止於斯所恨者父老不得終養子幼不見成立汝能任其責乎金號泣哽咽不能對夫言訖而逝金年二十七守節弗渝家窘力麻臬自資卒成其志

胡氏張氏

德慶州同知董彥和二子婦胡夫復宗卒

年二十九張夫復興繼卒年二十七俱誓不他適張子十四歲復夭胡子甫四歲時董祚中衰旁無期功之親二婦相與交持撫弱子至于成立里人表其堂爲雙節

陳氏

胡泊川妻越二載泊川卒陳哀慟幾絕一子景輔年未暮而泊川祖母母俱老孝養無缺育孤成人

程氏

鄱陽縣志

十二卷

列女

四十六

徐處仁妻程適處仁僅踰年時調官軍征廣東洞僚處仁以醫選從征視士卒疾溺鄱陽湖死程氏年二十一聞計哭絕復甦養本宗子繼爲後程守節訖無瑕玷

章氏

章閏益女性聰慧能書適吳季綱季綱後客死淮安章聞計慟絕復甦自念舅姑老而子女幼吾可死乎自是矢志苦守刺綉自給終舅姑喪卒年七十四

張氏

胡均政妻家貧夫蚤喪遺三弟俱幼生一子未朞張年二十三誓不再嫁紡績撫育延師訓夫之三弟及其子皆得成立孀居六十餘年貞節卓著

葉氏

李永良妻偕夫戍金陵之鷹揚衛踰年夫喪葉年二十二子女俱無且夕號哭聞者傷之尋夫弟迎歸于鄱守節弗渝卒年八

鄱陽縣志

十二卷

列女

四十七

十二

陳氏黃氏

彭公叔之二子婦陳夫蕃卒以刀斷髮納棺誓無他志黃夫續爲邑庠生卒黃年二十一厲志亦如之各撫一子孺雙節云

巨氏

陳永懷妻永懷卒巨年二十八仰天哭曰吾不幸無夫夫不幸無子何天道若是乎乃守節嫠居莫奪其志奉姑尤謹以節孝

穉焉

馬氏

饒州守禦總旗馬思敬女年笄適棠陰巡檢夏斌次子泰纔四十日泰溺死馬痛絕者數四竟孀居以終

李氏

胡永徵妻永徵卒李年二十五無子守節養姑凜然節操沒齒如初

方氏

鄱陽縣志

十二卷

列女

四十八

張景榮妻景榮蚤世方年二十六子在襁褓百爾辛勤以奉姑育子志節彌堅

吳氏

江宗讓妻不數載宗讓客死聞之延平吳年二十五哀戚無虛日所遺二子俱幼守節終身

程氏

屈贇妻年二十五喪夫止遺二女孀居守節父母強其再適程曰屈氏祭祀誰奉之

有死而已卒不改志

徐氏

鄭武妻武喪時徐年二十七遺腹一子守節撫孤卒年七十二

胡貞姑

大理少卿閨女閨既被刑姑没入功臣家爲奴時年四歲勳貴嫌其幼欲去之老嫗匿于庖中獲免每日噉猫餘飯及長髮至寸則剪之仁宗登極赦還鄉依其母舅家終身不嫁年五十四而終鄉人謚曰忠胤貞姑今配祀忠臣祠

黎氏

樂乎人羣牧所千戶崔繼勳妻繼勳亡時黎年二十隣家不戒于火將延及抱夫柩痛哭以待俱焚風反得滅獨居一室紡績自膳孤燕巢其梁不去者十餘年人以爲貞節所感守志垂五十年以壽終

劉氏

張杲妻生子金聲甫一歲杲卒劉年二十
二哀毀骨立先是舅未葬劉曰寧無食豈
忍兩喪失所乃鬻田合夫葬之或諷以再
醮觸地折齒永矢靡他事姑孝死則復鬻
居殮葬母憐其單貧邀以同居曰我張門
婦固辭不往子兩失配有勸續以再醮者
艷然曰我羞與失節人居苦守四十七年
疾革囑子曰貧莫失志富莫改常至言矣
卒年六十七

趙氏

兵部郎中計士元妾士元妻江氏艱于子
勸納趙遇之有恩趙事江益謹越五年士
元卒官歸櫬涉楊子江遇暴風二孀抱棺
大痛隣牆皆傾喪舟獨免抵家立姪鯨爲
嗣二孀相依倚若形影或諷趙年少可歸
母家豐潤再適人者趙憤激兩手奮力自
瓜其面血淋漓欲以死殉念與江相爲命
忍死待之迨經營舅與夫喪葬家益落紡

績自贍備嘗艱難苦守四十餘年觀風者表其閭曰名門雙節江以命婦格于例不旌旌者獨趙故獨稱趙節婦云

林氏

史梓芳側室柔順純謹事姑趙氏極盡孝養朝夕定省始終弗渝時梓芳肄業國學姑疾危甚乃焚香祝天割股以進其疾立愈及姑歿哀痛幾絕至事夫尤盡禮敬梓芳嘗試棘闈不售林氏慰之曰維天不負

鄱陽縣志

十二卷

列女

五十一

苦心人君既勤學發皇自有日勿以爲慮夫卒年二十有八勁節自守數十餘載氏跡不出戶庭慤懃課子暨諸孫濟濟俱躬督夜讀不輟儼若嚴師焉年八十有一卒

詹氏胡氏

詹氏江光進妻胡氏江光遇妻詹氏夫喪年十九胡氏夫喪年二十二同處一室勵節三十餘年兩庠聞之當事學憲朱公扁曰貞節伊族廉憲公和亦以天壽雙節贈

之詹年七十三胡年八十五卒

周氏

史靜隱妻茂州判官周彥英女年三十二而寡遺孤甫及週家貧甚或爲謀再適計遂錮門欲餓死已絕食二日適鄰嫗馬氏遣婢持米易手繡乃復得食日夕吞淚撫孤孤年十五隨舅商河南周前後資給一取于繡刺衣百結日不再炊饑寒十六年孤飄零異鄉念母行丐而歸躬漁樵以爲

鄱陽縣志

十二卷

列女

五十二

養子母拮据以葬亡者及婚娶五傳而至桂芳云

鮑氏

鮑氏千戶所軍人熊守仁妻適二載而仁故誓不再醮杜門辟纊奉姑惟謹年過六旬竟未踰閨闕萬曆年間鄰舍火將延及其宅忽不撲自滅邑令周武烈見而異之詢其故里老以鮑節婦居對因畫述其生平苦守事周喟然曰節孝未揚有司之過

也卽申上司請聞於朝如倒建坊旌表繡使陳于廷獎其廬曰兩間正氣

陳氏

江光奎妻奎蚤卒陳時年二十八欲以身殉舅姑以孫幼再三諭之乃已自口日勤紡績仰事俯育備嘗艱苦孀居六十年有如一曰惜未有上共行于當事者年八十八卒

戴氏

鄱陽縣志

十二卷

列女

五十三

史椿芳妻年二十三夫卒生一子甫及週姑朱氏以孫幼家貧欲令改適戴不忍奉命朝夕悲號形容枯槁從姑趙氏哀其志謂曰汝母憂吾當爲成之于是衣食之需一切取給于趙戴遂得行其志撫子書福年及弱冠復以疾卒戴終身縞素蔬食飲水依依趙氏者四十餘年卒年六十九趙氏命其子梓芳厚塋于牛首山麓

左氏

王琚妻年十九歸王生子一週而夫卒左氏椎髮縞衣不出戶外時舅有妾性悍每凌抑之欲令別適左氏惟抱子垂泣而已及子成立未幾又卒左氏復撫孫年八十七而終

劉氏

郡城東關人寓居古田早孤性至孝九歲母病日夜憂悴忽遇黃冠教之割股和糜以進有異香母未食而心已爽獲延三月

鄱陽縣志

十二卷

列女

五十四

邑候某旌以冲齡純孝又曰淑媛儒行庠士徐世泰聘爲子昇婦及歸能執婦道夫久疾事之惟謹及夫蚤歿以節操自矢撫二子成立卒年五十六

徐氏

庠生胡永繼妻適一歲而永亡徐矢同死絕飲食從姑輩百方解之有激烈不如從容之喻徐良久曰信若所云未亡人死何足惜但夫旣乏傳妾又偕隕若敖之鬼不

其餒而乃持缺盃一枚長短箸一雙誓與同盡糲食淡蔬夏衣麻苧冬披破絮嚴東不重謂未亡人雖則免死敢希溫飽乎一僕呼應立闕外一婢事炊爨不許出戶庭萬曆丙辰直指使題請建坊卒年七十四

金氏

王思烈之側室本汜之祥符人思烈官河南僉書納焉萬曆癸卯思烈卒金氏年二十七子慶雲甫週半家業涼薄且昆弟三

鄱陽縣志

十二卷

列女

五十五

分之愈見窘迫金氏矢志無他雖備極艱苦寂無怨言撫孤而教訓之至于娶媳見孫全節而卒年四十七

王氏

沙朗李康侯妻

初其父石田中党女

許字李氏子未幾

父亡李子雙瞽諸父有異議女曰薄命人亡父早許李氏盟言在耳豈忍背之且旣盟而瞽棄瞽不義違父不孝何以立世幸勿言此迨歸李氏勤執婦道內外無間言

昔宋劉庭式娶瞽女今此女又適瞽夫視世之盛衰寒盟者遠矣

山氏

余栢妻生子未週而夫卒山守志撫子葬其舅姑與夫及其先世之未葬者皆經理安厝之子將成立而又天復育服姪文歡俾承宗祀苦節三十餘年至五十四而卒

高氏

太學生鄭嘉產妻嘉產蚤喪高自二十四

鄱陽縣志

十二卷

列女

五十六

歲而嫠居至七十三歲卒子鼎臣府庠生善鐫古章通篆隸諸書法壽亦至八十四

蘇氏

儒生王尚用妻尚用弃世蘇氏年甫二十撫子家亨伶仃孤苦而能勤儉恭順內外無間言至七十五而終厥孫贇而家益昌非德厚之徵歟

胡氏

魯衝鄉儒生甄文明妻文明卒胡年二十

六生子應節方三歲苦操自勵族人同聲
贊之卒年七十五有孫六人

金氏

千戶所軍人江宗海妻年二十守節無子
撫姪爲嗣至六旬堅貞不渝學使者給節
凜冰霜額以旌之

羅氏

史書褒妻方伯元楨女也年九歲卽知女
訓大義及笄歸史婦道克修書褒卒羅年

鄱陽縣志

十二卷

列女

五十七

三十二念家世清貞遂茹苦食淡終身不
衣絹帛幼子乘古方二歲督令向學焚膏
不繼每作女紅以佐之穉未亡人五十年
督學侯公峒曾以節孝表其門年八十一
卒

隆姬

名德故明爵宗朱翊鉉女也生而靜慧解
讀書七歲時其父許字邑童張應選無何
父卒無嗣姬奉母趙氏大母周氏居喪以

禮年十九應選暴卒聞訃絕食欲殉母以
二嫠無依及父未葬爲諭姬始瞿然起喪
之如婦禮及服闋有議婚者二母隱喻以
意姬泣以死誓自是扃戶躬爨親屬罕睹
其面暇則繙繹經史及醫卜諸書遇歲洊
饑拮据以奉二母已則衣簞食淡恬如也
二母先後卒家雖貧悉力營葬事張氏姑
垂老次男又故姬歲時餽養弗替及歿并
爲經理喪葬維時諸當事歷以貞孝獎

之泰昌元年代巡陳于廷具實上聞制畧
云生本朱邸性自青霜未爲張也婦而鸞
影遂孤甘于母氏依而烏哺更若羨蒼筠
之植節旣久洵蘭英之發韻彌馨行府縣
建坊旌以貞孝云姬雖讀書能文然生平
不輕以字示人惟爲母作痛念曾手自楷
書女孝經一部付梓卒年七十有二仝母
葬芝山父墓旁

黃氏

邑庠生王三省繼妻前妻蘇氏婚踰年產一子而卒黃氏繼之甫一載三省赴口覆舟死鄱湖柩歸黃氏撫之痛哭欲自刃其姑止之曰不念老姑當念弱子黃遂剪髮毀容矢志事姑又訓子以至成立邑侯沈公光宗旌之曰冰清玉潔年八十餘而終

閔氏

郡庠生史詳古妻詳古貧而好學閔氏躬親紡織以佐之事姑尤極誠敬嘗有疾姑

鄱陽縣志

十二卷

列女

五十九

憐而慰之必勉力支持惟恐貽姑以憂也無何詳古歿于亂閔年方二十泣血號慟欲自盡者數四皆以姑救之而止時一子甫及週乃撫而痛曰吾之不容不死者以夫故吾之不忍卽死者以此藐孤故耳及子稍長口授經書無異師傅凡孀居十五年憂勞成疾卒年三十五

江氏

李天桂妻婚二載而夫夭江年十有八子

煌甫半歲遂不再適其後事姑能孝訓子克嚴冰霜之操數十載如一日族衆欲聞諸當事江泣止之曰從一而終右之訓也有何奇節敢驚世駭俗乎卒年七十餘

徐氏

王思曾妻思曾蚤卒二子俱幼伯某每事逼凌之冀其改適徐誓不失守遂躬汲業腐以育二孤積勞成疾未及五旬而卒後二子亦成立

鄱陽縣志

十二卷

列女

六十

于氏

朱翊娥妻性貞儉不尚華靡及笄歸世祿之家親執女紅服惟麤布而已事姑孝謹久而弥篤姑有疾晨夕侍湯藥衣不解帶者逾月姑卒飲水啜粥戚如也其居家嚴整二子各授一經督課惟勤故能克自激昂馳聲藝苑後爲未亡人兵荒相繼卒能履困而亨人皆以爲贇母云

崔氏

史書奇妻明經崔應龍女性貞靜七歲卽知禮法如成人年十五將適書奇值奇疾篤其父方正士也不暇卜吉召女命之往送之門至則巫醫在室婚禮未備倉猝告祖畢卽脫簪鉞親湯藥不遑寢食者逾旬月夫疾方愈事舅姑克孝姑年七十祖姑年九十每雞鳴問安進食不懈年三十書奇以疾卒崔撫諸孤以栢舟自矢親紡績造酒漿以佐孤讀書資苦節幾四十年族

鄱陽縣志

十二卷

列女

六十一

黨咸稱之年七十一卒

畢氏

庠生閔繼訓繼室夫卒年僅二十餘遂以節操自勵其所嘗艱苦有人所萬不堪者畢處之恬如歷三十餘年始終如一

閔氏

史書昌妻父閔翼明究心理學能引古禮以齊其家閨教不肅而成故閔氏自幼卽嫺禮訓及歸書昌孝養厥姑聞于族黨又

能每事佐夫以義書昌學修行篤閔氏與有內助之功至其訓子及孫尤多義方孀居三十餘載凡一言一動必遵禮法雖後膺象服之榮而持躬儉約不殊寒素尤近世所難能真可儀型風俗云

黃氏

王家昌妻家昌早喪遺子用佐方三歲上有孀姑黃氏年二十四栢舟自矢紡績以供姑養族黨稱之及用佐稍長口授孝經

鄱陽縣志

十二卷

列女

六十二

語孟諸書不假外傳順治甲午用佐登賢書而母訓諄諄未已又及孫與曾孫卒年七十有八前盧公有扁云冰玉清貞

朱氏

史紀古妻年近三十夫卒矢志鞠子而長子又殤次子魯方六歲朱備歷多艱撫之至于成立而家道益昌年登八十天之報施夫豈或爽

李氏

鄭■妻生子甫一週而夫卒李氏哀痛
幾死者再姑慰之曰死與撫孤孰難李聞
之遂節哀以撫孤自矢其族有名艾虎者
見其子方襁褓心利其有謀所以奪之李
誓以必死其謀遂阻當事屢加旌異卒年
七十有四至今子若孫咸能以詩書自振
皆李苦節所遺也

袁氏

方起龍妻龍卒氏年二十三矢志撫子始

鄱陽縣志

十二卷

列女

六三

終無玷年四十九卒

朱氏

庠生張惟省妻秉性柔順事舅始曲謹盡
孝姑老以乳佐粥爲養延齡九十夫初艱
嗣三爲置妾以進夫不肯受氏焚香夜禱
乃生子名鏐惟省尋卒鼎革時流離播遷
百罹脩嘗終始如一兩庠公舉

郡侯黃公扁曰瑤房松雪邑令王公以畫
荻慈徽額云

朱貞女

邑庠朱安女名良弟許聘郡庠徐愈之子徐成將嫁而成死女遂衰經歸徐守志事聞于邑令鄧公公大嘉之卽欲旌以扁額以年少未果後二年而貞女死與成合墓焉鄉隣眷族及諸庠多士哀之各吊以詩并記其事刻藏于家

程氏

儒士王秉道妻秉道早世乏嗣程年二十

鄱陽縣志

十二卷

列女

六四

矢志守節時有逼嫁者激烈投繯雖寡且貧事舅姑無缺養日夕紡績甃石成墓虛其右期死則同穴之志撫侄從諾以繼夫祀竭蹶爲完娶現育三孫兩庠及闔鄉上其實于邑侯萊陽王公以林下孤貞表之

詹氏李氏

凰岡徐伯邃之妻若妾也邃讀書早卒易簀時唯屬二氏以撫孤守節詹年二十五

李僅二旬矢志靡他今雙璧無玷且勗其子若孫疊振青箱比之畫荻爲罔愧云以上

俱守節

王氏

鮑君定妻乳姑延壽姑疾焚香請以身代又能割股痊夫夫歿全節撫子隣里屢詞請詳前撫佟給扁口孀孤貞惜氏年與例不符未獲題請旌表云松蓋鄉三十三都事載府志

藍氏

鄱陽縣志

十二卷

列女

六五

劉璋妻璋溺死藍懷其破鏡誓以死殉投水觸墻救而獲免後竟縊死年纔二十

鄭氏

鄭松女適山曜踰年夫卒慟絕屢欲以死從救免家益貧無姑姒相倚或勸改志拒之其母迎歸贍于家家又故寥落後竟強以委禽者鄭知勢不可奪乃給就浴室自緘其裏易以初嫁時鞋投繯而死

廉氏郡庠生其介之女幼知書長適江祐祐

卒廉年十八居喪盡哀斷髮毀容幾不欲
生父母止之遂終日閉戶雖至親罕覩其
面後聞有警報慮身無所主決志以死殉
夫但念母老發篋取簪珥遺之時有覺者
解之曰禍尚未迫死奚爲廉曰苟迫矣求
死其可得耶言罷作詩明志整衣束身從
容縊于內寢

郭氏

王某妻居四十里市聞有警載舟避之舟

鄱陽縣志

十二卷

列女

六十六

復被執鞭笞其夫夫泣謂妻曰汝不從余
命絕矣婦佯給之曰釋吾夫吾從汝命夫
得脫郭度夫去遠追不能及遂躍入水兵
人挽其髻復入舟中多方懼之斷不從肢
解之于提控汊

嚴氏

陳某妻乘舟匿湖中土兵猝至嚴慮受辱
携兒赴水死同舟十四口遂俱溺死

胡氏

城北胡滿女及笄未嫁避亂于胡家邊兵忽至拽之行胡堅不從乃怒刃其首數日顏色不變

徐氏

徐德八五之女避亂見獲并其父母舁歸伍至簸箕橋母子俱墜橋死因怒其父并殺之

李氏

李芳九之女遇兵欲污之不從遂碎其首

鄱陽縣志

十二卷

列女

六十七

于階下而死

王氏

太學生胡肇鳳妻同姑裴氏艤舟避亂于珠湖濱時水偶渴舟不及發兵至挾之行王怒曰頭可斷足必不移強之自投于地者三遂刃其項而死棄屍嚴家橋數日如生王氏乃愍忠公址四世女孫也

胡氏

庠士李開先妻年二十七開先歿遺孤方

二歲同姑鮑氏避亂千土湖兵至登舟奪其子投之水胡遂望子所投處溺焉翼日母子相抱浮水面人皆異之

姜氏

史乘古妻大司成金和女孫幼讀列女傳諸書及歸乘古克修婦道尤以孝見稱乘古官寧津偕之任旣而聞有警欲送之南歸事姑羅氏姜執不可遂同處圍中卒全城而後返未幾里居復有警或勸爲趨避

鄱陽縣志

十二卷

列女

六十八

計姜荅曰吾昔已辦此今後有塘前有井復何憂哉及臨期率次子皜婦萬氏俱赴井死

毛氏

邑庠生計雲崧妻遇兵劫之不從投茭池死卽前姜氏甥婦也

鄒氏

邑庠生羅欽相妻避亂儒堂匿山中兵卒至持挺格鬪遭支解死

包氏

邑庠生廉質妻歸廉方兩載質沒包遂投井死年甫二十

李氏

周繼曾妻避亂山谷被獲不從怒碎其首而死越三日見其屍猶凜凜有生氣

胡氏

上谷程洞妻乙酉五月江北散寇流入鄱諸婦竊議何以避之胡荅曰惟有一死耳

鄱陽縣志

十二卷

列女

六十九

及寇至傷其姑胡潛閉戶自經死

程氏

庠生黃裳吉妾避亂油渡遇游騎索吉金帛已盡見程有姿色逼之登舟吉怒搏之見殺程遂躍入水死

金氏

永平關民金以立女同父母避亂橋木灣見被獲婦女嬉笑舟中毫不愧色竊詈何不速死母戒之勿言荅曰萬一不幸必不

效彼爲父母辱後歸陳某僅七十日遇游
騎掖之行再四不從怒刺腹洞背而死

張氏

方伯瞻岳陳公女甥仍爲陳氏所聘年十
八隨父母避亂油渡爲游卒所執殺其七
歲妹以刼之終不從遂遇害

王氏

丘學舜妻遭亂夫婦擬遠避泊舟月波門
忽兵至登舟逼奪王氏不從投水死

鄱陽縣志

十二卷

列女 七十

方氏

小港民方思溪女年及笄遇游卒掠之以
手攀石不肯行且罵聲不絕怒亦其手遂
殺之手血著石經年猶鮮以爲烈性所感云

黃氏

碧山民黃雲樵女適方如珪同方氏女避
山中亦爲所執不從死時方盛暑越六七
日見之膚髮完整久之喉間血噴起

朱氏

庠生凌俊妻聞警預懷女投澹津湖死越五日殮之時當盛暑他俱潰穢朱獨如生

程氏

北隅民查太初妻孀居被掠將污之不從

携子勝祖投後園井中死已上係死節

朱氏

王治平妻甲寅之變倉卒避一茅舍被兵

擄獲今欲污人呼其一井為烈婦并坐落樂亭

潘氏

鄱陽縣志

十二卷

列女七十一

蓮湖朱繼山髮妻繼山早世氏年廿七舟栢

自矢操孝遠霜養一姑教子脩極苦辛有族戚曰節孝遠霜養一姑教子享壽八十有五

王氏湖南人縣庠訓導王化廣女被掠至百

花洲逼之以死不從刃交胷腹死

馮氏碭山人別駕馮知己女幼許字某氏子

及笄某忽病卒訃聞馮氏感痛閉戶自經厄已上二女係流寓

流寓

歐陽詢

詢字信本潭州人隋太常博士唐歷太子

率更令弘文館學士封渤海男穎悟絕人博貫經史倣王羲之書遒勁過之其帖云年二十餘至鄱陽喜其地沃土平衆士徃徃輳聚僑寓甚久

戴叔倫

叔倫字幼公潤州人官至容管經畧使史紀其治精明仁恕多方畧故所至稱最後寓饒之東湖刺史馬載愛其詩築堤湖上時訪之宅址卽今薦福寺

鄱陽縣志

十二卷

流寓

七十二

盧綸

綸字允言河中蒲人號大曆十才子避天寶亂客鄱陽

趙磻老

磻老字渭師東平人門下侍郎野之姪以婦翁歐陽懋待制澤入仕歷官工部侍郎從范石湖使金虞丞相亦薦之遂擢同知臨安坐殿司招兵事謫饒州遂家焉撰拙菴雜著三十卷外集四卷

蘇昞

昞字季明武功人橫渠門人卒業于程氏元祐末呂進伯薦之自布衣召爲博士累官翰林學士後坐上書邪黨竄于鄱陽

程迥

迥字可久金陵人隆興進士歷泰興簿德興丞進賢上饒尹得祠寓鄱陽蕭寺自幼與前輩名公交游多所見聞故其言諭有據以古學自任人多宗之稱沙隨先生

鄱陽縣志

十二卷

流寓

七十二

屈德

德字德生成陽人父栗字希平徽宗重和元年以八行補太學上舍旣釋褐爲孔目尋遷饒州通判建炎以來所在盜起紹興初李成張用叛張俊爲江淮路招討使帥兵討之栗預焉成等敗走張上栗功擢江東宣撫副使兼知饒信卒謚忠穆勅葬郡城之東土名格勒橋德廬于墓側構風木亭以居孝思是時中土擾攘不能歸遂家

焉子二長益傑開化丞次承傑舉進士袁
州判官

洪适

适字景伯樂平人忠宣公皓之長子紹興
壬戌中博學宏詞科除秘書省正字出知
荊州軍遷戶部郎中擢大常少卿方羽檄
交馳書詔填委适当內外制甚契上心轉
翰林學士簽書樞密院事乾道元年拜尚
書右僕射同平章事再三乞去得歸卜居

鄱陽縣志

十二卷

流寓

七十四

郡城外西北名曰盤洲菴菴左右爲齋曰
容膝曰聚螢後亭曰花信自是泉石之樂
一十六年卒謚文惠所著盤洲集隸釋唐
宋登科記

洪邁

邁字景廬适弟官至翰林學士後與适請
歸孝宗賜邁御書野處二字邁卽城西蟻
洲創廬以扁之後樓曰楚望卒謚文敏所
著野處類藁南史精語隸纂隸釋隸韻容

齋隨筆續筆彞堅志

江萬里

萬里字子遠號古心都昌人少神雋鋒穎
舉于鄉以文名理宗嘗書其姓名于屏几
累官至左丞相兼樞密使器望清峻議論
風采傾動一時帝眷注尤厚爲賈似道所
忌乞祠求退僑居饒城會襄樊破萬里鑿
池芝山後圃扁其亭曰止水人莫喻其意
及聞警執門人陳偉噐手曰大勢不可支

鄱陽縣志

十二卷

流寓

七十五

余雖不在位當與國存亡城破竟赴止水
池死子鎬及左右相繼溺積屍如疊翌日
萬里屍獨浮從者葬之贈太師益國公謚
文忠

江萬頃

萬頃號古崖萬里弟歷守大郡提舉江西
常平茶鹽宮饒破遇執死之

朱鉦

鉦字士鉦建安宋徽國公七世孫讀書好

吟有聲儒林洪武初鄱人江春以武功拜汀州衛指揮同知納鉦爲贅壻踰年春卒春妻下邳郡夫人虞偕鉦扶春柩歸葬鄱而鉦遂占籍焉後舉人材任廣東始興知縣子清工詞翰永樂間舉賢才任曲江知縣台州府通判

葉綬

綬字叔章上虞人永樂九年綬祖砥知饒州府十二年綬補郡學弟于員中江西鄉

鄱陽縣志

十二卷

流寓

七十六

試砥終于任綬遂占籍鄱陽授應州學正綬儀觀清癯學問該博尤善古篆弟緯緯子冕登正統十年進士歷官松江知府

周正

正字子建其先吉水人天順間以東寧衛籍中山東鄉試登丁丑進士歷官雲南左布政使道經鄱見山水之勝遂卜居焉正好古博學善吟詠與丘霽嚴彪爲詩會所著拙逸稿梅花百詠集

潘一諤

一諤字諤諤別號茹虛福建惠安人萬曆辛卯鄉薦歷知州縣轉故淮藩審理尋遷右長史勤學好問卽居宅爲講學之所名里仁社口從郡中諸理學遊淮王涵玉創菁莪書院以延禮士夫實自諤導之生平歷九省唯持親師取友四字覺所得恒多寓饒二十餘年卒于官年七十二所著有日錄講義云

鄱陽縣志

十二卷

流寓

七十七